

**Raja Muda Perlis Lawat Panti Asuhan Di Medan
Bernama
3 Februari, 2013
Daripada Adnan Jahaya**

MEDAN (Indonesia), 3 Feb (Bernama) -- Raja Muda Perlis Tuanku Syed Faizuddin Putra Jamalullail yang kini dalam lawatan kerja tiga hari ke Medan, hari ini melawat Panti Asuhan Yayasan Amal dan Sosial Al Jam'iyatul Washliyah, di Jalan Ismailiyah, dekat sini.

Ketibaan baginda yang diiringi Raja Puan Muda Perlis, Tuanku Hajah Lailatul Shahreen Akashah Khalil disambut ketua panti itu, H.M. Silahuddin yang kemudiannya memberi taklimat ringkas mengenai operasi pusat itu.

Panti asuhan itu menempatkan kira-kira 200 anak yatim di bawah pengawasan Yayasan Amal dan Sosial Am Jam'iyatul Washliyah yang turut menyediakan kemudahan surau untuk mereka.

Sempena lawatan itu, baginda, yang juga Yang Dipertua Majlis Agama Islam dan Adat Istiadat Melayu Perlis (MAIPs), turut menyampaikan sumbangan MAIPs kepada panti asuhan itu tetapi jumlahnya tidak dinyatakan.

Turut menyampaikan sumbangan kepada panti asuhan itu termasuk syarikat Sukimi Oil Sdn Bhd, Normy Batik Sdn Bhd, PDRM Kelantan, Jabatan Veterinar Negeri Perlis dan juga para delegasi lawatan kerja itu.

Bertitah di majlis itu, Tuanku Syed Faizuddi berharap anak-anak yatim sentiasa menghayati nilai positif dalam kehidupan dan tidak berputus asa dalam berusaha memburu cita-cita memperolehi kehidupan berkualiti.

Menurut baginda sumbangan kepada anak yatim adalah tindakan kolektif dan tidak pernah dibatasi sempadan negara.

Sementara itu, Silahuddin dalam ucapannya gembira menerima kunjungan baginda berdua ke panti asuhan itu.

Beliau berharap kunjungan Raja Muda dan Raja Puan Muda Perlis itu akan menjadi ikutan kepada pihak lain untuk terus memberi sumbangan sama ada dalam aspek moral mahupun material dalam membantu mereka membangunkan masa depan anak yatim di situ.

Turut hadir pada majlis itu ialah Konsul Jeneral Malaysia di Medan Ahmad Rozian Abd Ghani dan Pengarah Tourism Malaysia di Medan, Cik Nor Asikin Haron.

-- BERNAMA

Copyright © 2013 BERNAMA

Source: <http://www.bernama.com/bernama/v6/bm/newsindex.php?id=925774>